

開放文學 – 科幻寓言 – 蝸觸蠻三國爭地記 第十五回 強中強飛船制蚱蜢 巧外巧天網布蜘蛛

觸蠻二國，聞蝸牛國王變法自強，交仗之，日夜潛謀侵略，垂涎【白居易詩：漏壁絡蝸涎】蝸國之疆土。是時，蠻國有電學專家白鳥者，能為空中電雷，發於空際，中人則鑽入膚骨。又有名丹鳥【丹鳥，螢也。白鳥，蚊蚋也】者，能以無煙火藥，造空中飛彈，著物即燃。自兩種軍器發明，槍炮均無所用。同時，觸國亦有電學博士蚱蜢，創為空中飛艇，因以己名名其艇，曰蚱蜢艇，能於空中擲炸彈，毀人城池。且能利用空中電雷，空中飛彈，故尤為猛烈。二國皆深秘其術。

有游士權輿父【《爾雅》：權輿父，守瓜。注：今瓜中小蟲，喜食瓜葉】者，獻瓜分之策於二國，二國之王大喜。陽與蝸牛王通好，而陰使權輿父為公使，以行人葛蚤為副，駐蝸牛國京城，測量蝸牛國之輿圖。葛蚤善走，日行數百里，因盡知蝸牛國之壘塞。蝸牛王知其有陰謀，使秘密偵探蚯蚓曲探之，不能得。蝸牛國有大電學家曰吳蠶，能為催眠術。於是，設飲以宴權輿父，而令吳蠶侍酒。以術催眠者三【《桑柘經》：蠶，一晝夜而蛻殼，有三眠者、四眠者】，權輿父盡吐其謀。

蝸牛王聞二國新發明之軍械，猛烈異常，則大恐，不知所措。喟然歎曰：「弱肉強食，為鼠肝，為蟲臂，吾屬今為之虜矣。」【《莊子》：偉哉，造化又將以汝奚為？以汝為蟲臂乎，以汝為鼠肝乎？】吳蠶進曰：「王無恐，臣有友朱知，深通電學，能為空中天網。敵軍軍械雖猛，誠得空中天網以御之，二國雖強，不足平矣。王盍召而詢之。」

吳蠶與朱知，幼時同學於繅絲廠。及長，又共研究電學，故知之深也。正是：
蠶叢世界文明進，鬥力何如斗智贏。